



PLAN AKTIVNOSTI TOKOM MJESECA ČISTOĆE APRIL U 2025. GODINI

Provedbenim propisima i određenim planovima nalažu se obaveze očuvanja prirode i stvaranje zdravije i ljepše sredine u kojoj živimo i radimo. Članom 88. Odluke o komunalnom redu (Službeni glasnik Općine Zavidovići broj 3/2015 i 1/2017) određeno je da Gradonačelnica, na prijedlog Službe za upravu poljoprivrede, vodoprivrede i komunalnih poslova, jedan mjesec u godini proglašava mjesecom poboljšanja estetskog izgleda grada, te da Gradonačelnica donosi odluku o proglašenju određenog mjeseca mjesecom čistoće i sa istom upoznaje građane putem sredstava javnog informisanja.

Gradonačelnica je donijela Odluku o proglašenju mjeseca čistoće April u 2025. godini, broj: 02-19-517/25-AP-2 od 26.03.2025. godine, odnosno mjesecom poboljšanja izgleda i hortikulturnog uređenja grada Zavidovići, a obaveza Službe za upravu poljoprivrede, vodoprivrede i komunalnih poslova je da utvrdi prijedlog Plana aktivnosti u mjesecu čistoće.

U toku mjeseca čistoće April, pored dodatnih aktivnosti JKP „Radnik“ d.o.o. Zavidovići, učešće u planiranim aktivnostima treba da uzmu i građani grada Zavidovići, privredni subjekti, učenici osnovnih i srednjih škola, članovi NVO-a, udruženja građana, sportski kolektivi, itd.

PRIPREMNE AKTIVNOSTI

1. Upoznavanje građanstva, udruženja, privrednih subjekata, ustanova i dr. sa Odlukom o proglašenju mjeseca čistoće April.
Način – web stranica Grada Zavidovići, putem lokalnih sredstava informisanja, dostavom obavještenja na adrese, putem mjesnih zajednica, udruženja, udruženja građana i sl.,
Zadužen - Služba za upravu poljoprivrede, vodoprivrede i komunalnih poslova,
Vrijeme – do 01.04.2025.godine i tokom trajanje mjeseca čistoće April.
2. Upoznavanje građanstva, udruženja, privrednih subjekata, ustanova i dr. sa Planom aktivnosti u mjesecu čistoće April.
Način - web stranica Grada Zavidovići, putem lokalnih sredstava informisanja, dostavom obavještenja na adrese, putem mjesnih zajednica, udruženja građana i sl.,
Zadužen - Služba za upravu poljoprivrede, vodoprivrede i komunalnih poslova i JKP „Radnik”,
Vrijeme - od 01.04.2025. do 30.04.2025. godine.

KONKRETNE AKTIVNOSTI

Konkretne aktivnosti će biti usmjerene na:

- a) Uređenje svih javnih površina u užem dijelu grada,
- b) Uređenje dvorišta kuća, ustanova, preduzeća, vjerskih zajednica i dr.,

- c) Zajednička ekološka akcija čišćenja puta prema jezeru „Mašica“, obale rijeke Krivaje u naselju Maoča (Dištica-Stipin Han) i platoa na planini Klek (tzv Prvi relej) povodom dolaska proljeća-Čimburijada, od strane Planinarskog društva „Tajan 1929“, SNIK „Atom“, GSS Zavidovići i Rafting klub „Krivaja-Zavidovići“,
- d) Uklanjanje i sanacija tri divlje deponije na području grada,
- e) Krčenje i uređenje zapuštenih javnih površina u užem dijelu grada,
- f) Štampanje i distribucija edukativnih letaka,
- g) Zajednička akcija uređenja i čišćenja javnih površina na području grada sa učenicima škola, mjesnim zajednicama, udruženjima, javnim ustanovama, sportskim kolektivima, zaposlenicima gradske uprave i drugim,
- h) Hortikulturno uređenje zelenih površina u gradu na sedam lokacija od strane građana, udruženja, sportskih kolektiva, javnih ustanova, zaposlenika gradske uprave i drugih.

PROVOĐENJE AKTIVNOSTI

a) Uređenje svih javnih površina u užem dijelu grada

U mjesecu čistoće April posebna pažnja će se posvetiti na uređenje javnih površina u užem dijelu grada, ali i na vanurbanom području u saradnji sa mjesnim zajednicama. Za provođenje ove aktivnosti obezbjeđena su sredstva u Budžetu Grada te će se ići u smjeru:

- povećanja nivoa aktivnosti JKP „Radnik“ na čišćenju javnih površina, uklanjanju ostataka iz zimskog perioda, proljetno uređenje javnih površina (košenje), pranje javnih saobraćajnih površina i dr.

- upoznati građanstvo, javne ustanove, preduzeće i dr. o njihovim obavezama koje proizlaze iz Odluke o komunalnom redu.

Način - Služba za upravu poljoprivrede, vodoprivrede i komunalnih poslova će ovu aktivnost koordinirati sa JKP „Radnik“ d.o.o., te na adekvatan način animirati i ostale,

Vrijeme – 01.04. do 30.04.2025.godine,

Zadužen – Služba za upravu poljoprivrede, vodoprivrede i komunalnih poslova, nadležne inspekcije, JKP „Radnik“ d.o.o., građanstvo, javne ustanove, privredna društva, i dr.

b) Uređenje dvorišta kuća, ustanova, preduzeća, vjerskih zajednica i dr.

Za uspješno provođenje aktivnosti tokom mjeseca čistoće April jedna od najvažnijih stavki jeste i uređenje privatnih, vlastitih dvorišta. Samim tim korakom stiče se puno ljepša slika i izgled grada. Prema Odluci o komunalnom redu, Odluci o proglašenju mjeseca čistoće, obaveza svih vlasnika prostora, zemljišta, jeste da uredno održavaju svoja dvorišta i okućnice. U tu svrhu bit će urađen i distribuiran letak koji će tretirati proljetno uređenje dvorišta, obaveze građana, privrednih subjekata, ustanova i sl. Pripremu i distribuciju obavještenja za vlasnike dvorišta (građani, ustanove, preduzeća i dr.) o obavezama koje proističu iz Odluke o komunalnom redu obaviti će Služba za upravu poljoprivrede, vodoprivrede i komunalnih poslova.

Način - štampanje letaka i upoznavanje vlasnika dvorišta slanjem letaka, putem sredstava informisanja, putem mjesnih zajednica, udruženja i dr.,

Vrijeme - od 01.04.2025. do 30.05.2024.godine,

Zadužen - Služba za upravu poljoprivrede, vodoprivrede i komunalnih poslova, komunalni inspektor.

c) Zajednička ekološka akcija čišćenja puta prema jezeru „Mašica“, obale rijeke Krivaje u naselju Maoča (Dištica-Stipin Han) i platoa na planini Klek (tzv Prvi refej) povodom dolaska proljeća-Čimburijada, od strane Planinarskog društva „Tajan 1929“, SNIK „Atom“, GSS Zavidovići i Rafting klub „Krivaja-Zavidovići“

Dionica puta od planinarskog doma u Mitrovićima do jezera Mašica u okviru Parka prirode „Tajan“ atraktivna je i u samom srcu prirodu te je uvijek predmet interesovanja zaljubljenika u prirodu i planinara. Proljeće je uvijek rezervisano za uređenje te dionice pa će tako biti i ove godine. Posebno je povećana posjećenost radi izgradnje planinarskog doma. Lijeva obala rijeke Krivaje na potezu između mostova u Dištici i Stipinom Hanu je izuzetno posjećena u ljetnim mjesecima od strane kupača. Iako su postavljeni kontejneri i table upozorenja o zabrani nelegalnog odlaganja otpada, ipak se nađu neodgovorni pojedinci koji to ne koriste, odnosno ne poštuju. Stoga se više puta tokom godine ova dionica čisti, a posebno u aprilu kada sa dolaskom proljeća dolazi i lijepo vrijeme. Svake godine PD „Tajan 1929“ odredi jednu nedjelju početkom proljeća kako bi se organizovala tradicionalna „Čimburijada“ i obilježio dolazak proljeća. U sklopu same manifestacije organizuje se akcija prikupljanja otpada na platou gdje se održava „Čimburijada“ kao i okolnim putnim prilazima, te se naravno očisti i sav otpad koji nastane tokom manifestacije.

Način – nabavka vreća za otpad, rukavica, hrana i piće za učesnike, obezbjeđenje sredstava za odvoz otpada,

Vrijeme - 01.04. do 30.04.2025.godine,

Zadužen - Služba za upravu poljoprivrede, vodoprivrede i komunalnih poslova, Planinarsko društvo „Tajan 1929“, SNIK „Atom“, GSS Zavidovići, Rafting klub „Krivaja-Zavidovići“.

d) Uklanjanje i sanacija tri divlje deponije na području grada

U ovoj godini, tačnije u mjesecu čistoće April, biće uklonjene tri divlje deponije na području grada a zemljište sanirano i očišćeno. Obzirom da je kompletno područje grada pokriveno organizovanim načinom prikupljanja i odvoza otpada, broj istih se znatno smanjio ali će i one biti uklonjene.

Način - Služba za upravu poljoprivrede, vodoprivrede i komunalnih poslova će utvrditi lokacije na kojima se nalaze divlje deponije, količine, te provesti postupak javne nabavke u skladu sa Zakonom o javnim nabavkama BiH,

Vrijeme - 01.04. do 30.04.2025.godine,

Zadužen - Služba za upravu poljoprivrede, vodoprivrede i komunalnih poslova.

e) Krčenje i uređenje zapuštenih javnih površina u užem dijelu grada

Pojedine javne površine u užem dijelu grada koje nisu obuhvaćene Programom održavanja javnih površina bit će predmet uređenja u mjesecu čistoće April. Ova aktivnost do sada se pokazala veoma uspješnom, jer svaka dodatna površina koja se uredi je korak naprijed. Ove godine određene su dvije lokacije koje treba urediti. Prva je park koji se nalazi iza KSC Zavidovići te stambene jedinice prema „Krivajinoj vili“, koje treba urediti i osloboditi javne površine. Druga lokacija se nalazi na desnoj obali rijeke Bosne uzvodno od gradskog mosta (most 328. b.br.), gdje bi se iskrčilo rastinje i zategla površina koja se naslanja na ribarsku stazu.

Način - Služba za upravu poljoprivrede, vodoprivrede i komunalnih poslova će utvrditi lokacije koje je potrebno urediti, te provesti postupak javne nabavke u skladu sa Zakonom o javnim nabavkama BiH,

Vrijeme - 01.04. do 30.04.2025.godine,
Zadužen - Služba za upravu poljoprivrede, vodoprivrede i komunalnih poslova.

f) Štampanje i distribucija edukativnih letaka

Odlukom o komunalnom redu broj: 01-23-3682/14 od 31.03.2015. godine uređuje se vršenje komunalnih djelatnosti, komunalni red, prava i obaveze pravnih lica, fizičkih lica i građana pri obavljanju komunalnih djelatnosti i održavanju komunalnog reda u cilju uređivanja naselja, održavanja čistoće i čuvanja javnih površina, skupljanja, odvoza i postupanja sa sakupljenim komunalnim otpadom, uklanjanja snijega i leda na području općine Zavidovići, mjere za provođenje komunalnog reda i kaznene odredbe predviđene za povrede ponašanja utvrđene ovom Odlukom. U skladu sa Odlukom će se i vršiti distribucija letaka kako bi se građanstvo, fizička i pravna lica upoznali sa njenim odredbama. U prvom koraku bi se letkom javnost upoznala o donešenoj Odluci o proglašenju mjeseca čistoće April. Sadržaj drugog letka bi se bazirao na Odluci o komunalnom redu gdje bi komunalni inspektor upoznao javnost i sve subjekte na obavezu poštivanja odredbi iz Odluke. Treći letak bi bio dijeljen od strane JKP „Radnik“ d.o.o. Zavidovići uz račune za komunalne usluge za mjesec mart, a tu bi se korisnici usluga ponovo upoznali sa svojim obavezama kada je u pitanju legalno odlaganje otpada.

Način - Služba za upravu poljoprivrede, vodoprivrede i komunalnih poslova i JKP „Radnik“ d.o.o. Zavidovići će obaviti pripremu, štampanje i distribuciju letaka odgovarajućeg sadržaja,

Vrijeme - 01.04. do 30.04.2025.godine,

Zadužen - Služba za upravu poljoprivrede, vodoprivrede i komunalnih poslova i JKP „Radnik“ d.o.o. Zavidovići.

g) Zajednička akcija uređenja i čišćenja javnih površina na području grada sa učenicima škola, mjesnim zajednicama, udruženjima, javnim ustanovama, sportskim kolektivima, zaposlenicima gradske uprave i drugim

Ova aktivnost je jako bitna iz više razloga. Prvi je njena masovnost i brojnost, obzirom da uključuje i učenike, građane ispred mjesnih zajednica, kao i udruženja, te na taj način će se aktivirati najmlađa populacija. Osim pomenutog, ovo je jedan od načina edukacije i podizanja ekološke svijesti naših sugrađana. Podršku u ovoj aktivnosti će pružiti i JKP „Radnik“ d.o.o. Zavidovići u dijelu prikupljanja i odvoza otpada. Za ovu akciju će se pripremiti poseban plan kojim će se definisati aktivnosti svih učesnika i površine koje će biti tretirane. Akcija će biti održana na Dan planete Zemlje ili Dan Zemlje koji se obilježava 22. aprila u više od 150 zemalja širom svijeta. Namjera je da ljude širom svijeta podsjeti u kakvom je stanju priroda planete na kojoj žive, kao i da se stanovništvu ukaže na probleme ekosistema, na zagađenje naseljenih mjesta i na to kako poboljšati kvalitet životne sredine. Sam dan na koji bude organizovana akcija sastoji se iz dva dijela. U prvom dijelu dana učenici i drugi učesnici aktivno rade na prikupljanju otpada, a u drugom dijelu dana se organizuje sportski turnir u malom fudbalu i odbojci u kategorijama osnovnih i srednjih škola. Za sve učesnike se obezbjedi prevoz, majice, rukavice, hrana i sokovi.

Način - Služba za upravu poljoprivrede, vodoprivrede i komunalnih poslova obavit će dogovore sa menadžmentom u školama, te obezbjediti opremu za rad, prevoz, hranu i napitke, diplome i pehare za učesnike.

Vrijeme – 22.04.2025.godine

Zadužen - Služba za upravu poljoprivrede, vodoprivrede i komunalnih poslova i JU „Prva osnovna škola“ Zavidovići.

h) Hortikulturno uređenje zelenih površina u gradu na sedam lokacija od strane građana, udruženja, sportskih kolektiva, javnih ustanova, zaposlenika gradske uprave i drugih

Na sedam lokacija u užem dijelu grada planirano je da si izvrši sadnja cvijeća, ukrasnog grmlja i stabala koji će stvoriti ljepšu sliku grada. Za ovu namjenu angažovat će se i stručnjak iz oblasti hortikulture, koji će svojim savjetima, prijedlozima i radom na terenu doprinijeti da se posao uradi kvalitetno. U planu je nabavka velikog broja sadnica koje će zasaditi građani zajedno sa zaposlenicima gradske uprave i uz asistenciju JKP „Radnik“ d.o.o. Zavidovići. Akcija uređenja se planira na isti dan kada i akcija uređenja i čišćenja javnih površina na području grada na Dan planete Zemlje ili Dan Zemlje.

Način – Grad Zavidovići će provesti postupak javne nabavke u skladu sa Zakonom o javnim nabavkama BiH, nabaviti planirane sadnice te ostalu opremu koja je potrebna, kao i hranu i sokove za učesnike.

Vrijeme – 22.04.2025.godine

Zadužen - Služba za upravu poljoprivrede, vodoprivrede i komunalnih poslova.

POTREBNA SREDSTVA ZA REALIZACIJU PLANA

Plan je sačinjen na osnovu raspoloživih sredstava odobrenih u Budžetu Grada Zavidovići za 2025.godinu. Sredstva su planirana Budžetom grada Zavidovići za 2025. godinu, kako za mjesec čistoće April, tako i za krčenje i uređenje zapuštenih javnih površina, sanaciju divljih deponija i održavanje javnih površina, kako slijedi:


- Izdaci za održavanje javnih površina (prema Programu održavanja javnih površina),
- Izdaci za sanaciju i uređenje zapuštenih javnih površina (5.000,00 KM),
- Izdaci za sanaciju divljih deponija (5.000,00 KM) i
- Izdaci za mjesec čistoće-april (18.000,00 KM).

Akt pripremio:


(Amir Mahmutović, dipl. ecc)



POMOĆNIK GRADONAČELNICE


Idriz Alihodžić, prof.

